




全唐詩話
卷三



全唐詩話目錄

卷三

牛僧孺

李紳

劉禹錫

陳潤

賈島

李正封

崔護

張又新

柳公權

陸鴻漸

章孝標

施肩吾

孟簡

張肅遠

許康佐

張南史

徐凝

令狐楚

張仲素

郎士元

于良史

舒元興

李賀

柳宗元

邵真

李宣遠

王建

朱灣

蘓郁

韋丹

王播

周匡物

劉言史

劉猛

李餘

李涉

劉昭禹

孫昌胤

嚴休復

李慶餘

楊虞卿

楊汝士

張志和

嚴維

李播

李德裕

鄭還古

裴休

薛宜僚

九老會胡杲

吉皎

劉真

鄭據

盧真

張渾

白居易

全唐詩話目錄

全唐詩話卷之三

牛僧孺

樂天夢得有除夜詩僧孺和云惜歲歲今盡
少年應不知。淒涼數涼輩。歡喜見孫兒。暗
減一身力。潛添滿鬢絲。莫愁花笑老。花自
幾多時。

元和三年宣政殿試賢良方正能直言極諫
科一十人登科其後僧孺李宗閔王起賈
餗四人皆相次拜相先是白居易在翰林

爲考校官後僧孺罷相出鎮揚州居易在
洛中有詩云北闕至東京風光十六程坐
移丞相閣春入廣陵城紅旆擁雙節白鬚
無一莖萬人開路看百吏立班迎閩外君
彌重。罇前我亦榮。何須身自得。將相是門
生。

公始至京置琴書灞漣間先以所業謁韓文
公皇甫員外。二公披卷卷首有說樂一章
未閱其詞遽曰且以拍板爲什麼對曰樂

句二公相顧大喜曰期高文必矣公因謀
所居二公良久曰可於客戶坊稅一廟院
公如所教二公復誨之曰某日可遊青龍
寺薄暮而歸二公其日聯鑣至彼因大書
其門曰韓愈皇甫湜同謁幾官先輩不遇
翌日輦轂名士咸往觀焉奇章之名由是
赫然矣。或云僧孺登第與同輩登政事堂
宰相曰掃廳奉候

樂天求箏於維揚僧孺先有詩曰但愁封寄

去魔物或驚禪樂天云會教魔女弄不動
是禪心樂天云思黯自誇前後服鍾乳三
千兩而歌舞之妓甚多乃謔予衰老故答
思黯詩云鍾乳三千兩金釵十二行妬他
心似火欺我鬢如霜慰老資歌笑銷愁仰
酒漿眼看狂不得狂得且須狂竒章又有
詩云不是道公狂不得恨公逢我不教狂

李紳

紳初以古風求知於呂溫溫見齊煦誦憫農

詩曰春種一粒粟秋收萬顆子四海無閒
田農夫猶餓死鋤禾日當午汗滴禾下土
誰知盤中飧粒粒皆辛苦又曰此人必爲
卿相果如其言

紳字公垂中書令敬玄孫號短李穆宗召爲
翰林學士與李德裕元稹同時號三俊武
宗時爲相居位四年出鎮淮南卒

憶夜直金鑿奉詔承旨詩云月當銀漢玉繩
低深聽簫韶碧落齊門壓紫垣高綺樹閣

連青瑣近丹梯墨宣外渥催飛詔草定新
息促換題明日獨歸花路近可憐人世隔
雲泥

劉禹錫

長慶中元微之夢得韋楚客同會樂天舍論
南朝興廢各賦金陵懷古詩劉滿飲一杯
飲已即成曰王濬樓船下益州金陵王氣
黯然收千尋鐵鎖沉江底一片降幡出石
頭人世幾回傷往事山形依舊枕江流而
今四海為家日故壘蕭蕭蘆荻秋白公覽
詩曰四人探驪龍子先獲珠所餘鱗爪何
用耶於是罷唱

元和十年自朗州召至京戲贈看花君子云
紫陌紅塵拂面來無人道看花回玄都
觀裏桃千樹盡是劉郎去後栽

再遊玄都觀絕句并序云余正元二十一年
為屯田郎時此觀未有花是歲出牧連州
貶朗州司馬居十年召至京師人人皆言

有道士手植仙桃。滿觀如紅霞。遂有前篇以志一時之事。旋又出牧。今十有四年。復為主客郎中。重遊玄都。蕩然無復一樹。惟兔葵燕麥。動搖春風耳。因再題二十八字。以俟後遊。時大和二年三月也。詩云。百畝中庭半是苔。桃花淨盡菜花開。種桃道士歸何處。前度劉郎今又來。

禹錫嘗對賓友。每吟張博士籍詩云。新酒欲開期好客。衣冠暫脫見閒身。對花木則吟

王右丞詩云。興闌鳴鳥換坐久。落花多白二十二。好余秋水詠云。東屯滄海闊。南瀼洞庭寬。余自知不及韋蘓州。春潮帶雨晚來急。野渡無人舟自橫。嘗過洞庭。雖爲一篇。思杜員外落句云。年來洞庭上。白蘋愁殺白頭人。鄙夫之言。有愧於杜公也。揚茂卿校書過華山詩曰。河勢崑崙遠。山形菡萏秋。此實爲佳句。

白樂天任杭州刺史。携數妓還洛陽。後却還

錢塘故禹錫戲答云其那錢塘蘓小小憶
君淚黯石榴裙。沈存中曰禹錫霓裳羽衣
曲云三鄉陌上望仙山歸作霓裳羽衣曲
又王建詩云聽風聽雨作霓裳樂天詩注
云開元中西涼府節度使楊敬述造鄭愚
津陽門詩注云葉法善嘗引上入月宮聞
仙樂及上歸但記其半遂於笛中寫之會
西涼府都督楊敬述進婆羅門曲與其聲
調相符遂以月中新聞爲散序用敬述所
進爲其腔而名霓裳羽衣曲說各不同今
蒲州逍遙樓楣上有唐人橫書類梵字相
傳是霓裳譜字訓不通莫知是非或謂今
燕部有獻仙音曲乃其遺聲然霓裳本謂
之道調法曲今獻仙音乃小石調耳未知
孰是

山園故國周遭在。潮打空城寂寞迴。淮水東
邊舊時月。夜深還過女墻來。樂天掉頭苦
吟嘆賞良久曰石頭詩云潮打空城寂寞

迴吾知後之詩人不復措辭矣禹錫金陵五題自序

禹錫字夢得附叔文擢度支員外郎人不敢
斥其名號二王劉桻憲宗立禹錫貶連州
未至斥朗州司馬作竹枝詞武元衡初不
爲宗元所喜自中丞下除右庶子及是執
政禹錫久落魄乃作問大鈞謫九年等賦
又叙張九齡事爲詩欲感諷久之召還宰
相欲任南省郎乃作玄都觀看花君子詩

當路不喜出爲播州易連州徙夔州由知
州刺史入爲主客郎中復作遊玄都觀詩
有兔葵燕麥之語聞者益薄其行俄分司
東都裴度薦爲集賢學士度罷出刺蘓州
徙汝周二州會昌朝檢校禮部尚書卒

故國思如此若爲天外心寄白湖上收宿雨

句故人日已達窓下塵滿琴坐對一樽酒

恨多無力斟幕踈螢色迥露重月華深萬
境與群籟此時情豈任無禪思何妨在玉

琴真僧不見聽時心秋堂境寂夜將半雲
去蒼梧湘水深聽琴

夢得曰桺八駁韓十八平淮西碑云左殮右
粥何如我平淮西雅云仰父俯子韓碑無
有帽子使我爲之便說用兵伐叛矣夢得
曰韓碑柳雅余爲詩云城中晨雞喔喔鳴
城中鼓角聲和平羨愬之入蔡城也須臾
之間賊無覺者又落句云始於元和十二
載重見天寶昇平時以見平淮之年

陳潤

送駱徵君云野人膺辟命溪上掩柴扉黃卷
猶得去青山豈更歸馬留苔蘚迹人脫薜
蘿衣他日相思處天邊望少微

潤大曆間人終坊州郿城縣令樂天之外祖
也丈夫不感恩感恩寧有淚心頭感恩血
一滴染天地

賈島

島字浪仙范陽人初爲浮屠名無本能詩獨

變格入僻以矯艷於元白來洛陽韓愈教
為文去浮屠舉進士終普州司戶島久不
第吟病蟬之句以刺公卿或奏島與平曹
等為十惡逐之詩曰病蟬飛不得向我掌
中行折翼猶能薄酸吟尚極清露華凝在
腹塵點誤侵睛黃雀并烏鳥俱懷害爾情
大中末授遂州長江簿初之任屆東川守
者厚禮之島獻感恩詩曰匏革奏終非獨
樂軍城未曉啓重門何時却入三台貴此

日空知八座尊羅綺舞間收雨點纔貅闔
外卷雲根逐遷屬吏隨賓列撥棹扁舟不
忘恩自長江遷普州司倉方干自鏡湖寄
詩曰亂山重復疊何路訪先生豈料多才
者空垂不第名閒曹猶得醉薄俸亦勝耕
莫問吟詩苦年年芳草平島至老無子因
啖牛肉得疾終於傳舍

島詩有警句韓退之喜之其渡桑乾詩曰客
舍并州三十霜歸心日夜憶咸陽無端更

渡桑乾水。却望并州是故鄉。

又赴長江道中詩曰策杖馳山驛逢人問梓
州長江何日到行客替生愁晉公度初立
第於街西興化里鑿池種竹起臺榭島方
下第或以爲執政惡之故不在選怨憤題
詩曰破却千家作一池不栽桃李種薔薇
薔薇花落秋風起荆棘滿庭君始知皆惡
其不遜島爲僧時洛陽令不許僧午後出
寺島有詩去不如牛與羊猶得日暮歸韓

愈惜其才俾反俗應舉貽其詩云孟郊死
葬北邙山。日月星辰頓覺開天恐文章中

斷絕再生賈島在人間由是振名

或曰非退之詩

題杜司戶亭子云牀頭枕是溪邊石井底泉
通竹下池宿客未眠過夜半獨聞山雨到
來時

題李欵幽居云閒居少隣並草徑入荒村鳥
宿池中樹僧敲月下門過橋分野色移石
動雲根暫去還來此幽期不負言

哭孟郊云身死聲名在多應萬古傳寡妻無
子息破宅帶林泉塚近登山道詩隨過海
船故人相弔處斜日下寒天。

夜半長安雨燈前越客吟

贈吳處士句

島嶼夏雲

起汀洲芳草深

句

秋風吹渭水落葉滿長

安

句

山鍾夜渡空江水汀月寒生古石樓

句

舊國別多日故人無少年

句

李正封

唐文皇好詩大和中賞牡丹上謂程修己曰

今京邑人傳牡丹詩誰為首脩己對曰中
書舍人李正封詩天香夜染衣國色朝酣
酒時楊妃侍上曰粧臺前宜飲以一紫金
盞酒則正封之詩見矣。

退之正封從軍有晚秋郾城聯句詩正封云
從軍古云樂談笑青油幕燈明夜觀碁月
暗秋城柝遂為警策正封字中護終監察
御史

崔護

護字殷功。正元十二年登第。終嶺南節度使。沈存中云。唐人以詩主人物。故雖小詩。莫不極工。而後已。所謂旬鍛月鍊者。信非虛言。小說護題城南詩。其始曰。去年今日。此門中。人面桃花相映紅。人面不知何處去。桃花依舊笑春風。後以其意未全。語未工。改第三句曰。人面祇今何處去。至今所傳有此兩本。惟本事詩作祇。今何處在。唐人作詩大率如此。雖有兩今字。不恤也。取語

意爲主耳。後人以其有兩今字。故多行前

篇

筆談

張又新

又新字孔昭。薦之子。附逢吉。罷貶汀州刺史。又附李訓。訓死。復坐貶。終左司郎中。時號又新。張三頭。謂進士狀頭宏。詞敕頭京兆。解頭。又新嘗作廣陵從事。有佐酒妓。每致情焉。後二十年。罷江南郡。舟道廣陵。適李紳鎮淮南。又新方懼其讎已。而又遇風漂

沒二子紳憫然復書曰端溪不讓之詞愚
罔懷怨荆浦沉淪之事鄙實憫然宴遇殊
厚前所謂酒妓者猶在席又新以指染酒
即席爲詞曰雲雨分飛二十年當時求夢
不曾眠。今來頭白重相見。還上襄陽玳瑁
筵。李即命妓歌以送酒

柳公權

公權武宗朝在內庭上嘗怒一宮嬪久之旣
而復召謂公權曰朕恠此人若得學士一
篇當釋然矣目御前蜀牋數十幅授之公
權畧不佇思而成一絕曰不分前時忤主
恩已甘寂寞守長門今朝却得君王顧重
入椒房拭淚痕上大悅令宮人上前拜謝
之

文宗時克翰林學士從幸永安宮苑中駐蹕
謂公權曰我有一喜事邊上衣賜父不及
時今年二月給春衣訖公權前奉賀上曰
可賀我以詩宮人迫其口進公權應聲曰

去歲雖無戰今年未得歸皇恩何以報春
日得春衣上悅激賞之

文宗夏日與諸學士聯句曰人皆苦炎熱我
愛夏日長公權續曰薰風自南來殿閣生
微涼諸學士屬和帝獨諷公權兩句辭清
意足不可多得乃令公權題於壁上字方
圓五寸帝觀之嘆曰鍾王復生無以加矣
公權字誠懸卒於太子太保

陸鴻漸

太子文學陸鴻漸名羽其先不知何許人景
陵龍蓋寺僧姓陸於堤上得初生兒收育
之遂以陸爲氏及長聰俊多聞學贍詞逸
詼諧辯捷性嗜茶始創煎茶法至今鬻茶
之家陶爲其像置於湯器之間云宜茶足
利至大和中復州有一老僧云是陸僧弟
子常諷其歌云不羨黃金壘不羨白玉杯
不羨朝入省不羨暮入臺唯羨西江水長
向金陵城下來鴻漸又撰茶經三卷行於

代令爲鴻漸形因日爲茶神有售則祭之
無則以釜湯沃之

章孝標

孝標元和十三年下第時輩多爲詩以刺主
司獨孝標爲歸燕詩留獻侍郎庾承宣得
詩展轉吟諷庾重典禮曹孝標來年登第
詩云舊壘危巢泥已落今年故向社前歸
連雲大厦無棲處更向誰家門戶飛孝標
及第除正字東歸題杭州樟亭驛云樟亭

驛上題詩客一半尋爲山下塵世事日隨
流水去紅花還似白頭人初成落句云紅
花真笑白頭人改爲還似且曰我將老成
名似我芳艷詎能久乎及還鄉而逝或曰
前有八元後有孝標皆桐廬人復同姓而
皆不達

李紳鎮揚州請孝標賦春雪詩命題於臺盤
上孝標唯然索筆一揮云六出飛花處處
飄粘窓拂砌上寒條朱門到晚難盈尺盡

是三軍喜氣銷。

長安秋日云田家無五行。水旱卜蛙聲。牛犢
乘春放兒孫。候暖耕池塘。烟未起。桑柘雨
初晴。歲晚香醪熟。村村自送迎。右二詩韋
莊又玄集

施肩吾

肩吾洪州人。元和十年登第。以洪州西山羽
化之地。慕其真風。高蹈於此。為詩竒麗。著
百韻山居詩。才情富贍。如荷翻紫蓋。搖波

面蒲瑩青刀。挿水湄。又烟粘薜荔。龍鬚軟
雨壓芭蕉。鳳翅垂。

隋曲有踈勒鹽。唐曲有突厥鹽。阿鵲鹽。或云
關中人謂好為鹽。故肩吾詩云。顛狂楚客
歌成雪。媚嫵吳娘笑。是鹽。蓋當時語也。今
杖鼓譜中尚有鹽杖聲。

孟簡

元和中。簡將試詣日者。卜之曰。近東門坐。即
得之矣。既入。即坐西廊。迫晚。忽得疾。隣坐

請與終篇見其姓即東門也乃擢上第
簡字幾道德州人元和中爲戶部侍郎以賊
貶後以太子賓客分司卒尤工詩尚節義

張肅遠

觀燈云。十萬人家火燭光。門門開處見紅粧。
歌鍾喧夜更漏暗。羅綺滿街塵土香。星宿
別從天畔出。蓮花不向水中芳。寶釵驟馬
多遺落。依舊明朝在路傍。肅遠元和進士
登第與舒元興聲價俱美出廣撫言

秦雲寂寂僧還定。盡日無人鹿遶床。句日暮

風吹官渡柳。白鷗飛出石墻頭。廢城句雙雙

白燕入祠堂。乳石洞玉女祠句

許康佐

元稹酬許五康佐詩云。猿啼三峽雨。蟬報兩
京秋。珠玉慙新贈。芝蘭忝舊遊。他年問狂
客。須向老農求。

康佐以中書舍人爲翰林侍講學士與王起
皆爲文宗寵禮帝讀春秋至昆殺吳子餘

祭問昆何人耶康佐以衆人方強不敢對
帝嬉笑後問李訓訓曰國君不近恒人以
爲輕死之道帝曰朕近恒人多矣得不慮
哉訓曰列聖知而不能遠惡而不能去陛
下念之宗廟福也於是衆謀剪除矣康佐
終禮部尚書

張南史

陸滕宅秋雨中探韻云同人永日自相將深
竹閒園偶辟強已被秋風交憶鱸更聞寒
雨勸飛觴歸心莫問三江水旅服徒沾九
月霜醉裏欲尋騎馬路蕭條幾處有垂楊
南史字季直幽州人以試叅軍避亂居揚
州再召未赴而卒

徐凝

范攄言樂天爲杭州刺史令訪牡丹獨開元
寺僧惠澄近於京師得之植於庭時春景
方深惠澄設油幕覆其上會凝自富春來
未識白先題詩曰此花南地知難種慚愧

僧閒用意栽。海燕解憐頻。睥睨胡蜂未識
更徘徊。虛生芍藥徒勞妬。羞殺玫瑰不敢
開。惟有數苞紅萼在。含芳只待舍人來。白
尋到寺看花。乃命徐同醉而歸。時張祐傍
舟而至。二生各希首薦。白曰。二君論文。若
蕪蘭之鬪鼠穴。勝負在於一戰也。遂試長
劍倚天外賦。餘霞散成綺詩。試訖解送。凝
爲元祐次耳。祐曰。祐詩有地勢遙尊嶽。河
流側讓關。又題金山寺詩曰。樹影中流見。

鍾聲兩岸聞。雖綦母潛云。塔影掛青漢。鐘
聲和白雲。此句未爲佳也。凝曰。美則美矣。
爭如老夫。今古長如白練飛。一條界破青
山色。遂擅場。祐嘆曰。榮辱糾紛。亦何常也。
遂行歌而邁。凝亦鼓柁而歸。自是二生不
隨鄉賦矣。白又以祐宮詞四句。皆數對。未
尾竒也。後杜牧守秋浦。與祐爲詩酒友。酷
吟祐宮詞。以白有非祐之論。常不平之。乃
爲詩以高之。曰。睫在眼前人不見。道於身

外更何求。誰人得似張公子。千首詩輕萬
戶侯。又曰如何故國三千里。虛唱歌詞滿
六宮。杜盛言其美者。欲以苟異於白而曲
成於張也。故牧又著論言。近有元白者。喜
爲淫言。媒語。鼓扇浮囂。吾恨方在下位。未
能以法治之。斯亦敷佐於祐耳。潘若冲郡
閣雅談云。凝官至侍郎。多吟絕句。曾吟廬
山瀑布。膾炙人口。又題處州縉雲山黃帝
上昇之所。鼎湖蓋黃帝鑄鼎處也。有池在

山頂。詩云。黃帝旌旗去不回。空餘片石碧
崔嵬。有時風捲鼎湖浪。散作晴天雨點來。
自後無敢題者。凝送馬向遊蜀云。遊子去
咸京。巴山萬里程。白雲連鳥道。青壁遍猿
聲。雨露經泥坂。烟花帶錦城。工文人共許
應記蜀中行。

青山舊路在白首醉還鄉。

別白試到第三橋

便入千頃花。

句

宿列上人房云。浮生不定若蓬飄。林下真僧

偶見招覺後始知身是夢更聞寒雨滴芭蕉

令狐楚

楚自翰林學士拜相子絢自湖州召入翰林
爲學士間歲拜相渭南尉趙嘏獻詩曰鷄
在卿雲冰在壺代天才業奉訃謨榮同伊
陟傳朱戶秀比王商入畫圖昨夜星辰回
劍履前年風月滿江湖不知機務時多暇
猶許詩家屬和無

張仲素

桂魄初生秋露微輕羅已薄未更衣銀箏夜
久殷勤弄心怯空房不忍歸

送春辭云日日人空老年年春更歸相歡在
樽酒不用惜花飛

閨人思云愁見遊空百丈絲春風惹斷更傷
離閒花落遍蒼苔地盡日無人誰得知

仲素字繪之建封之子憲宗以仲素段文昌
爲翰林學士韋貫之曰學士所以備顧問

不宜專取辭藝罷之後終中書舍人

郎士元

送張南史云雨餘深巷靜獨酌送殘春車馬
雖。媯。僻。鶯。花。不。棄。貧。蟲。聲。粘。戶。網。鼠。跡。印
床。塵。借。問。山。陽。會。如。今。有。幾。人。

士元字君胄中山人寶應中選畿縣官詔試
中書補渭南尉歷拾遺郢州刺史高仲武
云士元員外河岳英奇人倫秀異自家刑
國遂擁大名右丞已後與錢郎于長自丞

相以下。出使作牧。二公無詩祖餞時論鄙
之。兩公詞體大約欲同。然中郎公稍更閒
雅。近於康樂。如荒城背流水。遠鴈入寒雲。
又去鳥不知倦。遠帆生暮愁。又蕭條夜靜
邊風吹。獨倚營門望秋月。可齊衡古人掩
映時輩。又暮蟬不可聽。落葉豈堪聞。古人
謂謝朓工於發端。比之於今。有慚沮矣。
送彭將軍云。雙旌漢飛將。萬里獨橫戈。春色
臨關盡。黃雲出塞多。鼓鼙悲絕漠。烽火隔

長河莫斷陰山路。天驕已請和。

于良史

春山夜月云。春來多勝事。賞翫夜忘歸。掬水
月在手。弄花香滿衣。興來無遠近。欲去惜
芳菲。南望鐘鳴處。樓臺深翠微。

冬日寄李贊府云。地險朝陽滿。天邊宿霧收。
風無殘雪起。河帶斷冰流。北關馳心極。南
圖尚旅遊。登臨思不已。何處得銷憂。

閒居寄薛據云。隱几讀黃老。閒齋耳目清。僻
居人事少。多病道心生。雨洗山林濕。鷓鴣鳴
池館晴。晚來因廢卷。行樂至西城。

高仲武去良史工於清雅。主於形似。如風無
殘雪起。河帶斷冰流。吟文未終。較然在目。

舒元興

大和九年誅王涯等仇士良愈專恣。文宗惡
之。雖登臨遊幸。未嘗爲樂。或瞠目獨語。左
右莫敢進問。因題詩曰。輦路生春草。上林
花滿枝。憑高何限意。無復侍臣知。一日看

牡丹或吟曰折者如語含者如咽俯者如
愁仰者如悅吟罷方省元與詞不覺嘆息
泣下沾衣

李賀

杜牧之序其文集云賀字長吉元和中韓吏
部亦頗道其歌詩雲烟綿聯不足爲其態
也。水之迢迢不足爲其情也。春之盎盎不
足爲其和也。秋之明潔不足爲其格也。風
檣障馬不足爲其勇也。瓦棺篆鼎不足爲

其古也。時花美女不足爲其色也。荒國陔
殿梗莽丘隴不足爲其恨怨悲愁也。鯨吐
鼉擲牛鬼蛇神不足爲其虛荒幻誕也。蓋
騷之裔理雖不及辭或過之騷有感怨刺
懟言及君臣理亂時有以激發人意而賀
所爲無得有是賀能採尋前事所以深嘆
恨今古未嘗經道者如金銅仙人辭漢歌
補梁庾肩吾宮體謠求取情狀離絕遠去
筆墨畦逕間亦殊不能知之賀生二十七

年死矣。世皆曰使賀且未死。少加以理。奴僕命騷可也。

柳宗元

雪詩云。千山鳥飛絕。萬徑人蹤滅。孤舟蓑笠

翁。獨釣寒江雪。

視鄭谷亂飄僧舍之句不悞矣。東坡居士云。

子厚死三年。愚溪無復曩時矣。劉夢得聞之。賦三絕云。溪水悠悠春自來。草堂無主燕飛迴。隔簾惟見中庭草。一樹山榴依舊開。草聖數行留壞壁。木奴千樹屬隣家。惟見

里門通德勝。殘陽寂寞出樵車。柳門竹巷依然在。野草青苔日日多。縱有隣人解吹笛。山陽舊侶更誰過。

邵真

尋人偶題云。日昃不復午。落花難歸樹。人生能幾何。莫厭相逢遇。

真為李寶臣成德軍掌書記。寶臣死。其子惟岳與田悅。李正己拒命。真諫之。惟岳寤。使真作奏。復為將吏所沮。德宗詔張孝忠。朱

滔合兵討惟岳大敗其衆惟岳召真議歸
順悅遣扈炭來責惟岳且欲斬真惟岳懼
斬真以謝焉其後王武俊表其忠贈戶部
尚書

李宣遠

宣遠正元進士登第并州路作云秋日并州
路黃榆落照間孤城吹角罷數騎射鵬還
帳幙遙臨水牛羊自下山征人正垂淚烽
火起雲間

王建

千牛仗下放朝初。玉案傍邊立起居。每日請
來金鳳紙。殿頭無事不教書。延英引對

碧衣郎。江硯宣毫各別床。天子下簾親考
試。宮人手裏過茶湯。少年天子愛邊功。

親到凌烟畫閣中。爲見勲臣寫圖本。長教
殿裏作屏風。新調白馬怕鞭聲。供奉騎

來繞殿行。爲報諸王侵早起。隔門催進打
毬名。羅衫葉葉綉重重。金鳳銀鸞各一

業每遍舞頭分兩向。太平萬歲字當中。
魚藻宮中鎖翠娥。先皇行處不曾過。如今
池底休鋪錦。菱角雞頭積漸多。射生宮
女宿紅粧。請得新弓各自張。臨上馬時齊
賜酒。男兒跪拜謝君王。官人早起笑相
呼。不識堦前掃地夫。乞與金錢爭借問。外
頭還似此間無。日高殿裏有香烟。萬歲
聲來動九天。妃子院中初降誕。內人爭乞
洗兒錢。銀燭秋光冷畫屏。輕羅小扇撲

流螢。天階夜色涼如水。卧看牽牛織女星。
樹頭樹底覓殘紅。一片西飛一片東。自
是桃花貪結子。錯教人恨五更風。淚盡
羅巾夢不成。夜深前殿按歌聲。紅顏未老
恩先斷。斜倚熏籠坐到明。鴛鴦瓦上忽
然聲。晝寢宮娥夢裏驚。元是吾皇金彈子。
海棠花下打流鶯。

建初爲渭南尉。值王樞密者。盡宗人之分。然
彼我不均。復懷輕謗之色。忽過飲樞密深

憾其譏乃曰吾弟所作宮詞天下皆誦於口禁掖深邃何以知之建不能對後爲詩以贈之乃脫其禍建詩曰先朝行坐鎮相隨。今上春宮見長時。脫下御衣偏得着。進來龍馬每教騎。常承密旨還家少。獨對邊情出。殿遲不是官家頻向說。九重爭遣外人知。

李灣

高仲武云李灣率履正素放情江湖郡國交

辟潛耀不起有唐高人也詩體幽遠興致洪深因詞寫意窮理盡性於詠物尤工如受氣何曾異開花獨自遲所謂哀而不傷國風之深者也

灣爲李勉求平從事灣秋夜燕王郎中宅賦得露中菊云衆芳春競發寒菊露偏滋。受氣何曾異開花獨自遲。晚成猶有分欲採未過時。忍棄東籬下看隨秋草衰。

長安喜雪云千門萬戶雪花浮點點無聲落

瓦溝全似玉塵消。更積半成冰。片結還流
光。含曉色。清天苑。輕逐微風。透御樓。平地
已霑盈尺。潤年豐。須荷富民侯。

蘓郁

鸚鵡詞云。莫把金籠閉。鸚鵡箇箇分明。解人
語。忽然更向君前語。三十六宮愁幾許。
和戎詩云。關月夜懸青塚鏡。塞雲秋薄漢宮
羅。君王莫信和親策。生得胡雛轉更多。
郁正元元和間詩人。十二樓藏玉堞中。鳳凰

雙宿碧芙蓉。流霞淺酌誰同醉。今夜笙歌

第幾重。

步虛詞

吟倚雨殘樹。月收山下村。

韋丹

丹字公明。京兆人。幼孤。從外祖顏真卿。元和
中。帥江西。有政績。與東林靈澈上人爲忘
形之契。丹嘗爲思歸絕句。以寄澈。云。王事
紛紛無暇日。浮生冉冉只如雲。已爲平子
歸休計。五老巖前必共聞。澈奉酬詩曰。年
老身閒無外事。麻衣草坐亦容身。相逢盡

道休官去林下。何曾見一人。

王播

王播少孤貧嘗客揚州惠照寺木蘭院隨僧齋飧僧厭怠乃齋罷而後擊鐘後二紀播自重位出鎮是邦因訪舊遊向之題者皆以碧紗幕其詩播繼以二絕句曰三十年前此院遊木蘭花發院新修如今再到經行處樹老無花僧白頭又上堂已了各西東慚愧闍黎飯後鐘三十年來塵撲面而

今始得碧紗籠出撫言

周匡物

匡物字幾本潭州人元和十一年李逢吉下進士及第時以歌詩著名家貧徒步應舉至錢塘乏僦船之資久不得濟乃題詩公館云萬里茫茫天塹遙秦皇底事不安橋錢塘江口無錢過又沮西陵兩信潮郡牧見之乃罪津吏

劉言史

皮日休劉棗強碑文云歌詩之風蕩來久矣
大抵喪于南朝壞于陳叔寶然今之業是
者苟不能求古於建安即江左矣苟不能
求麗於江左即南朝矣或過爲艷傷麗病
者即南朝之罪人也吾唐來有是業者言
出天地外思出鬼神表讀之則神馳八壺
測之則心懷四溟磊磊落落真非世間語
也自李太白百歲有是業者雕金篆玉牢
竒籠怪百鍛爲字千鍊成句雖不追躅太

白亦後來之佳作也其與李賀同時有劉
棗強焉先生姓劉氏名言史不詳其鄉里
所有歌詩千首其美麗恢贍自賀外世莫
得比王武俊之節制鎮冀也先生造之武
俊雄健頗好詞藝一見先生遂加異敬將
署之賓位先生辭免武俊善騎射載先生
以貳乘逞其藝於野武俊先騎驚雙鴨起
於蒲稗間武俊控弦不再發雙鴨聯斃於
地武俊歡甚命先生曰某之伎如是先生

之詞如是可謂文武之會矣何不一言以
讚耶先生由是馬上草射鴨歌以示武俊
議者以爲禰正平鸚鵡之類也武俊益重
先生由是奏請官先生詔授棗強令先生
辭疾不就世重之曰劉棗強亦如范萊蕪
之類焉故相國隴西公夷簡之節度漢南
也少與先生遊且思相見命列將以襄之
髹器千事賂武俊以請先生武俊許之先
生由是爲漢南相府賓冠隴西公日與之

爲飲宴具獻酬之儀歌詩大播於當時爲
隴西公從事或曰以某下走之才誠不足
污辱重地劉棗強至重必以賓劉於幕更
之上何抑之如是公曰愚非惜幕間一足
地不容劉也然視其狀有不足稱者諸公
視某與劉分豈有間哉然反爲之惜其壽
耳後不得已問先生所欲爲先生曰司功
掾甚閒或可承闕相國由是掾之雖居官
曹宴見與從事儀等後從事又曰劉棗強

縱不容在賓署承乏於掾曹詘矣奚不疏
整其秩相國不得已而表奏焉詔下之日
先生不恙而宰相國哀之慟曰果然止掾
曹然吾愛客葬之有加等墳去襄陽郭五
里曰柈子關後先生數十歲日休始以鄙
文稱於襄陽襄陽邑人劉求高士也嘗述
先生之道業嘗詠先生之歌詩且嘆曰襄
之人只知有浩然墓不知有先生墓恐百
歲之後湮滅而無聞與荆棘凡骨溷吾子

之文吾當刊焉日休幸存既撫實錄之何
愧嗚呼先生之官卑不稱其德宜加私謚
然秦強之號世已美矣故不加焉是爲劉
秦強碑

劉猛

月生十五前日望光彩圓月滿十五後日畏
光彩瘦不見夜光色一罇成暗酒匣中龍
背鏡光短不照空不惜補明月慙無此良
工月生自念數年間兩手中藏鈞於心且

無恨他日爲我羞。古老傳童歌，運淫亦兵
象。夜夢戈甲鳴，苦不願年長。苦兩朝梳一
把白。夜淚千滴雨。可恥垂拱時。老作在家
女。晚
元微之酬劉猛見送詩如云：神劍土不蝕，異
布火不燒。其推重如此。

李餘

長安東門別立馬，生白髮。句霽後軒蓋繁，南
山瑞烟發。句嘗聞車馬繁，土薄憂水聲。句

餘登長慶二年進士第，蜀人也。張籍送餘歸
蜀詩云：十年人詠好詩章，今日成名出舉
場。歸去唯將新誥牒，後來爭取舊衣裳。山
橋曉上蕉花暗，水店晴看芋葉光。鄉里親
情相見日，一時携酒上高堂。

又賈島送餘往湖南云：昔去候溫涼，秋山滿
蜀鄉。今來從辟命，春物變涇陽。岳石掛海
雪，野楓堆渚檣。若尋吾祖宅，寂寞在瀟湘。

李涉

題鶴林寺僧室云終日昏昏醉夢間忽聞春
盡強登山因過竹院逢僧話又得浮生半

日閒

晚泊潤州聞角云孤城吹角水茫茫曲引邊
聲怨思長驚起暮天沙上馬海門斜去兩
三行

但將鐘鼓悅私慶肯以犬羊爲國羞句尼父
未適魯僂僂倦迷津徒懷教化心紆鬱不
能伸一遇知己言萬方始喧喧至今百王

則孰不挹其源句

劉昭禹

昭禹字休明婺州人也少師林寬爲詩刻苦
風雪詩云向夜深得心從天外歸

嘗與人論詩曰五言如四十箇賢人著一字
如屠沽不得覓句者若掘得玉合子底必
有蓋但精心求之必獲其寶在湖南累爲
宰後署天策府學士嚴州刺史卒于桂州
幕中有詩三百首

孫昌胤

和司空曙劉慎虛九日送人云京邑嘆離群
江樓喜遇君開筵當九日泛菊外浮雲朗
詠山川霽酣歌物色曛君看酒中意未肯
喪斯文

柳子厚與韋中立書云古者重冠禮將以責
成人之道是聖人所尤用心者也數百年
來人不復行近有孫昌胤者獨發憤行之
旣成禮明日造朝到外廷薦笏言於卿士

某子冠畢應之者咸憮然京兆尹鄭叔則
拂然曳笏却立曰何預我耶廷中皆大笑
天下不以非鄭尹而怪孫子何哉獨爲所
不爲也昌胤登天寶進士第

嚴休復

揚州唐昌觀玉蕊花拆有仙人遊悵然成二
絕云終日齋心禱玉宸魂銷目斷未逢真
不如滿樹瓊瑤蕊笑對藏花洞裏人又羽
車潛下玉龜山塵世何由覩舜顏惟有無

情枝上雪好風吹綴綠雲鬟

元和中見一女子從以二女冠三小僕直造花所佇立良久命小童折花數枝謂黃冠者曰曩有玉峰之期自是可以行矣行百步許遂不復見休復有詩元微之和云弄玉潛過玉樹時不教青鳥出花枝的應未有諸人覺只恐嚴郎卜得知

樂天詩云羸女輸乘鳳下時洞中潛歌弄花枝不緣啼鳥春饒舌青瑣仙郎可得知

朱慶餘

慶餘遇水部郎中張籍知音。索慶餘新舊篇擇留二十六章置之懷袖而推贊之時人以籍重名。皆繕錄諷詠。遂登科。慶餘作閨意一篇以獻曰。洞房昨夜停紅燭。待曉堂前拜舅姑。粧罷低聲問夫婿。畫眉深淺入時無。籍酬之曰。越女新粧出鏡心。自知名豔更沉吟。齊紈未足時人貴。一曲菱歌敵萬金。由是朱之詩名流於海內矣。

又題王侯廢宅云古巷戟門誰舊宅早曾聞
說屬官家更無新燕來巢屋唯有閒人去
看花空廡欲推塵滿櫺小池初涸草侵沙
繁華事歇皆如此立馬踟躕到日斜
張籍送慶餘歸越云東隣歸路遠幾日到鄉
中有寺山皆遍無家水不通湖聲蓮葉雨
野氣稻苗風州縣知名久爭邀與客同

楊虞卿

過小妓英英墓云凌旋騎馬出皇都聞說埋

花在路隅別我已為泉下土思君猶似掌
中珠四絃品柱聲初絕三尺孤墳草已枯
蘭質蕙心何所在焉知過者是狂夫樂天
夢得皆有和章

樂天云人間有夢何曾入泉下無家豈是歸
墳上少啼鴛取淚明年寒食更霑衣
夢得云但見好花皆易落從來尤物不長生
鸞臺夜直衣衾冷雲雨無因入禁城

虞卿字師臯虢州人佞柔善諧麗宗閔僧孺

相穆宗引爲右司郎中宗閱倚之時號黨魁爲京兆尹以罪貶虔州司戶叅軍死

楊汝士

唐名族重京官而輕外任汝士建節後詩云
拋却弓刀上砌臺上方樓殿宰雲開山僧
見我衣裳窄知道新從戰地來又云而今
老大騎官馬羞向關西道姓楊寶曆中楊
於陵僕射入覲其子嗣復率兩榜門生迎
於潼關宴新昌里第嗣復領諸生翼兩序

元白俱在賦詩席上汝士詩後成元白覽
之失色詩曰隔座應須賜御屏盡將仙翰
入高冥文章舊價留鸞掖桃李新陰在鯉
庭再歲生徒陳賀宴一時良史盡傳馨當
時疏廣雖云盛詎有茲筵醉醪醕其日大
醉歸謂其子弟曰吾今日墜倒元白時爲刑侍
令公居守東洛夜宴半酣公索句元白有
德色時公爲破題次至汝士曰昔日蘭亭
無豔質此時金谷有高人白知不能加遽

裂之曰笙歌鼎沸勿作冷澹生活元顧曰
樂天所謂能全其名者也

張志和

漁父歌云西塞山前白鷺飛桃花流水鱖魚
肥青箬笠綠蓑衣斜風細雨不須歸又云
釣臺漁父褐爲裘兩兩三三舴艋舟能縱
棹慣乘流長江白浪不曾憂又云雪溪灣
裏釣魚翁舴艋爲家西復東江上雪浦邊
風笑着荷衣不嘆窮又云松江蟹舍主人

歡菰飯蓴羹亦共飡楓葉落荻花乾醉宿
漁舟不覺寒又云青草湖中月正圓巴陵
漁父棹歌連釣車子掘頭船樂在風波不
用仙

嚴維

維字正文越州人與劉長卿善長卿對酒寄
維云陋巷喜陽和衰顏對酒歌懶從華髮
亂閒住白雲多郡簡容垂釣家貧學弄梭
門前七里瀨早晚子陵過維答云蘓耽佐

郡時近出白雲司藥補清羸疾窓吟絕妙
詞柳塘春水慢花塢夕陽遲欲識懷君意
朝朝訪檝師時劉為睦州司馬

李播

播以郎中典蘄州有李生攜詩謁之播曰此
吾未第時行卷也李曰頃於京師書肆百
錢得此游江淮間二十餘年欲幸見惠播
遂與之因問何往曰江陵謁盧尚書播曰
公又錯也盧是某親表李慚悚失次進曰
誠若郎中之言與荆南表文一時乞取再
拜而出

李德裕

元和十一年歲在丙申李逢吉下三十三人
皆取寒素時有詩曰元和天子丙申年三
十三人同得仙袍似爛銀文似錦相將白
日上青天德裕頗為寒素開路及謫官南
去或有詩曰八百孤寒齊下淚一時回首
望崖州出撫言

鄭還古

還古閒居東都將入京赴選柳當將軍者餞
之酒酣以一詩贈柳氏之妓曰冶豔出神
仙清聲勝管絃詞輕白紵曲歌遏碧雲天
未擬生裴秀何如乞鄭玄不堪金谷水橫
過墜樓前柳喜甚曰專俟榮命以此爲賀
未幾還古除國子博士柳見除目即遣入
京及嘉祥驛而還古物故乃放妓他適逸
史載還古初娶柳氏女嘉會之初夢娶房
氏後柳卒再娶東都李氏屬房直溫爲東
洛少尹李之舅也禮晏皆房主之始知舊
夢之前定也還古登元和進士第

裴休

贈黃蘗山僧希運詩曰自從大士傳心印
額上圓珠七尺身挂錫十年棲蜀水浮杯
令日渡江濱一千龍象隨高步萬里香華
結勝因擬欲事師爲弟子不知將法付何
人休會昌中官于鐘陵請還至郡以所解一

篇示之師不顧曰若形於紙墨何有吾宗
休問其故曰上乘之印唯是一心更無別
法心體一空萬緣俱寂如大日輪升於虛
空其中照耀靜無纖埃證之者無新舊無
淺深說之者不立義解不開戶牖直下便
是動念即乖其後休錄之爲傳心法要云
休字公美孟州人大中六年爲相能文章
爲人醞籍進止雍閒宣宗曰休真儒者

薛宜僚

宜僚以左庶子充新羅冊贈使至青州悅一
妓段東美賦詩曰阿母桃花方似錦王孫
草色正如烟不須更向滄溟望惆悵歡情
又一年到外國謂判官苗甲曰東美何故
頻見夢中數日而卒觀至青段奠之一慟
而卒

九老會胡杲

九老會賦詩云閒居同會在三春大抵愚年
最出羣霜鬢不嫌杯酒興白頭仍愛玉爐

薰徘徊玩柳心猶健老大看花意却勤
鑿落蒲斟拚醪酌香囊高挂任氤氲
搜神得句題紅紙望景長吟對白雲
今日交情何不替齊年同事聖明君

杲年八十九
懷州司馬

吉皎

休官罷任已閒居林苑園亭興有餘
對酒最宜花藻發邀歡不厭柳條初
低腰醉舞垂緋袖擊箏謳歌任褐裾
寧用管絃來合雜自親松竹且清虛
飛觥酒到須先酌賦詠

詩成不住書借問商山賢四皓不知此後

更何如

皎衛尉卿致仕年八十八

劉真

垂絲今日幸同筵朱紫居身是大年
賞景尚知心未退吟詩猶覺力完全
閒庭飲酒當三月在席揮毫象七賢
山茗煮時秋霧碧玉杯斟處綵霞鮮
臨堦花笑如歌妓傍竹松聲當管絃
雖未學窮生死訣人間豈不是神仙

是神仙

真前磁州刺史年八十七

鄭據

東洛幽閒日暮春邀歡多是白頭賓官班朱
紫多相似年紀高低次第勻聯句每言松
竹意停杯多說古今人更無外事來心肺
空有清虛入思神醉舞兩迴迎勸酒狂歌
一曲會閒身今朝何事偏情重同作明時
列任臣據前龍武軍長
史年八十五
盧貞
三春已盡洛陽宮天氣初晴景象中千朵嫩

桃迎曉日萬株垂柳逐和風非論官位皆
相似及至年高亦共同對酒歌聲猶覺妙
玩花詩思豈能窮先時共作三朝貴今日
猶逢七老翁但願醪醕常滿酌烟霞萬里
會應通貞前侍御史內供
奉官年八十三

張渾

幽亭春盡共為歡印綬居身是大官遁跡豈
勞登遠岫垂絲何必坐溪磻詩聯六韻猶
應易酒飲三杯未覺難每况襟懷同宴會

共將心事比波瀾風吹野柳懸羅帶日照
庭花落綺紈此席不須鋪錦帳斯筵堪作
畫圖看

渾前永州刺史年七十七

白居易

七人五百八十四拖紫紆朱垂白鬚囊裏無
金莫嗟嘆樽中有酒且歡娛吟成六韻神
還怯飲到三杯氣尚麤。鬼竄狂歌教婢拍
婆婆醉舞遣孫扶天年高邁二疏傳人數
多於四皓圖除却三山三天竺人間此會

且應無

居易刑部尚書致仕年七十四

樂天退居洛中作尚齒九老之會其序曰胡

吉劉鄭盧張等六賢皆多壽余亦次焉於

東都弊居履道坊爲尚齒之會七老相顧

旣醉且靜而思之此會希有因各賦七言

六韻詩一章以記之或傳諸好事者時會

昌五年三月二十四日樂天云其年夏又

有二老年貌絕倫同歸故鄉亦來斯會續

命書姓名年齒寫其形貌附于圖右與前

全唐詩話卷之三
七老題爲九老圖仍以一絕贈之云雪作
鬚眉雲作衣。遼東華表暮雙歸。當時一鶴
猶希有。何況今逢兩令威。洛中遺老李元
爽年一百三十
六禪僧如滿
年九十五歲又云時秘書狄無謨河南尹
盧貞以年未及七十雖與會而不及列

